




朝鮮志卷上

不著撰人名

檀君肇國箕子受封皆都平壤漢置四郡二府自是三韓瓜分
馬韓統五十四國辰卞韓各統十二國厥後新羅高句麗百濟
三國鼎峙新羅之地東南至海西至智異山北至漢水高句麗
東至海南至漢西北踰遼河百濟西南至海東至智異山北至
漢新羅滅高句麗百濟及其衰也弓裔據鐵原稱後高句麗甄
萱據完山稱後百濟高麗始祖統合三韓西北以鴨綠為限東
北以先春嶺為界至我康獻王建都漢陽定為八道中曰京畿



西南曰忠清其西抵大海皆古馬韓之域高句麗百濟分據其地東南曰慶尚其東南抵大海本辰韓之地南曰全羅其南抵大海本卞韓之地後為百濟所有西曰黃海其西抵大海古朝鮮馬韓舊地後為高句麗所有唐高宗滅高句麗不能守其地新羅遂并之及李世為弓裔所據高麗始祖盡有其地東曰江源其東抵大海本濊貊之地後為高句麗所有西北曰平安西抵鴨綠江北接靺鞨本朝鮮故地後為高句麗所有新羅文武王與唐將李勣攻滅之東北曰咸鏡東抵豆滿江北接靺鞨本高句麗之地八道之中忠清慶尚全羅三道地廣物衆州郡雄

巨最為富庶俗尚詩書人才之出比諸道倍多平安咸鏡二道境接靺鞨俗尚弓馬兵卒精強

京都

北鎮華山有龍蟠虎踞之勢南以漢江為襟帶左控關嶺右環渤海

景福宮

即王宮

勤政殿

受朝正殿

思政殿

在勤政殿北接引士大夫講論治道之所

康寧殿

在思政殿北

交泰殿

在康寧殿北

含元殿

在康寧殿西北

養心殿

在康寧殿西

玉顯閣

在思政殿東偏夜引講官論難經史之所

麟趾堂

在交泰殿東

紫微堂

在交泰殿東

清燕樓

在交泰殿東

忠順堂

在後苑王常不忘朝廷揭此名堂以寓敬順之誠

隆文樓

在勤政殿東

隆武樓

在勤政殿西

慶會樓

在思政殿西環樓為池池深廣種芙蓉渠中有二島

欽敬閣

在康寧殿西鑄銅為山高七尺許置閣中內設巧機用玉漏水激之使自輪轉五雲繞日朝夕出沒又設司辰武士玉女及十二神之儀每時至武士擊鐘玉女奉時牌而出十二神各于方所輒自起立時盡則玉女還入神亦還伏其運若神莫測其妙山之四面陳幽風四時之景以為候象授時敬天之所

報漏閣

在慶會樓南設座二層三神在上司時者撞鐘司更者擊鼓司點者扣鈺十二神在下各執辰牌時至自出時盡還入皆

刻木為像激水為機不假人力隨時自報不差毫釐為術最妙街中鐘鼓晨昏之節皆以此傳擊

簡儀臺

在宮城內西北隅築石為臺繚以石欄置簡儀其巔臺西植銅表斷青石為圭圭面刻丈尺寸分乃用影符取日中之影推得二氣盈縮之端又於昌德宮西麓起瞻星臺置小簡儀觀天象察氛祲候雲物通衢之側築臺置仰釜內刻周天度數畫十二神外列方位設衡南北衡腰穿小竅以測日晷使民知時早晚

資善堂

世子引僚屬講讀之所在東宮

昌德宮

在景福宮東王之別宮

仁政殿

受朝正殿

宣政殿

在仁政殿東亦講論治道之所

匪躬堂

在延英門南

昌慶宮

在昌德宮東

明政殿

受朝正殿

文政殿

在明政殿南

仁陽殿

在明政殿西

景春殿

在明政殿北

通明殿

在景春殿北

環翠亭

在通明殿北

倫序亭

在後苑常接王親兄弟諸君之所

社稷壇

在京城內西

先農壇

在東郊

先蠶壇

在東郊

厲壇

在北郊

宗廟

在京城內東

文廟

在成均館明倫堂之南

慕華館

在城西郊外館前立迎詔門以寓尊敬朝廷之意

各司

宗親府

宗室諸君之府

議政府

總百官平庶政理陰陽經邦國

忠勳府

諸功臣之府

儀賓府

尚王女者之府

敦寧府

王親外戚之府

義禁府

掌奉教推鞠之事

吏曹

掌文選勳封考課之政

戶曹

掌戶口貢賦田糧食貨之政

禮曹

掌禮樂祭祀宴享朝聘學校科舉之政

兵曹

掌武選軍務儀衛郵驛兵甲器仗門戶管鑰之政

刑曹

掌法律詳讞詞訟奴隸之政

工曹

掌山澤工匠營繕陶冶之政

漢城府

掌京都口帳市廛家舍田土回山道路橋梁溝渠逋欠負債
鬪毆晝巡檢屍車輛等事

司憲府

掌論執時政糾察百官正風俗申寃抑禁濫偽等事

開城府

掌治舊都

忠翊府

原從功臣之所

承政院

掌出納王命為任甚重必選堪為宰相者為之由是而陞為
六曹參判及二品諸職

掌隸院

掌奴隸簿籍及決訟之事

司諫院

掌諫諍論駁之事

宏文館

掌內府經籍及書筵文翰之任其選最重議政府館閣吏曹共議掄揀然後方許除授更日值宿講廟治道分御膳賜宮醞以寵之

藝文館

掌制撰辭命

成均館

掌儒學教誨作成人材之任

尚瑞院

掌印章符牌節鉞

春秋館

掌在王左右書言動記時政

承文院

掌事大咨表文書

通禮院

掌朝儀排班引接

奉常寺

掌祭祀議謚等事

宗簿寺

糾察宗室愆違之任

校書館

掌印頒經籍及香祝印篆之任

司饗院

掌供御膳及內府供餉等事

內醫院

掌和劑御藥

尚衣院

掌供御衣褂及內府財貨等物

司僕寺

掌輿馬廐牧之任

軍器寺

掌造兵器火炮等事

內資寺

掌內供米糴酒醬油蜜

內膳寺

掌諸宮殿供進酒醪

司稟寺

掌御廩米穀

禮賓寺

掌賓客宴享宗宰供饋常監視議政府官飯食進案時親自

助舉

司贍寺

掌造楮貨及貢布等事

軍資監

凡四所掌軍需儲積都中有二倉漕運所會江上有二倉

濟用監

掌進獻紬布人參毛皮及絲染織造等事

繕工監

掌土木營繕

司宰監

掌魚鹽燒木柎炬

掌樂院

掌教閱聲律

觀象監

掌天文地理測候刻漏等事

典醫監

掌醫藥

司譯院

掌譯諸方言語

世子侍講院

掌侍講經史規諷道義

宗學

掌宗室教誨

脩城禁火司

掌宮都城脩築宮殿公廨坊里救火

典設司

掌帳幕排設等事

豐儲司

掌米豆草芑紙地等物

廣興司

掌百官祿俸工匠軍兵雜務廩給

典艦司

掌京外舟艦

典涓司

掌治宮庭

社稷署

掌灑掃壇壝

宗廟署

掌守衛寢廟

平市署

掌勾檢市塵平斗斛丈尺低昂物貨

司醞署

掌酒醞

義盈庫

掌油蜜黃蠟素物

長興庫

掌席子油芑紙地

冰庫

掌藏冰

掌苑署

掌苑圃花果

司圃署

掌園圃蔬菜

養賢庫

掌成均儒生供餉米豆

典牲署

掌養犧供祭祀

司畜署

掌飼雜畜供宴享

造紙署

掌造表箋咨文紙及諸般紙

惠民署

掌醫藥療民庶疾病

圖畫署

掌繪畫之事

典獄署

掌獄囚

活人署

掌救活都城病人凡病人無歸者官給粥料藥物冬給燎炭
夏給冰

瓦署

掌造瓦磚

歸厚署

掌棺槨供卿相禮葬者及士大夫賜與民庶貧乏者亦給

中學

掌教誨小學之士他學同

南學

東學

西學

中部

掌管內檢察非法及橋梁道路里門警守家代打量人屍檢
驗等事他部同

東部

南部

西部

北部

中樞府

凡宰相或因病事故解務者授之以示優待

五衛都總府

掌治五衛軍務

訓練院

掌科試武才習讀武經練閱軍陣

世子翊衛司

掌陪衛東宮

讀書堂

在東湖幽靜處妙遊年少文學有重望者除本職任仕務輪番而往內府書籍隨意探討使之溫習涵養以為後日大用地凡鋪設什器紙地筆墨饌飯酒醴燈燭諸具無一不備每遣中使賜御醞珍膳以示寵異膺此選者時人擬之登蓬瀛

風俗

崇尚信義篤好儒術禮讓成俗柔謹為風士大夫喪葬祭禮一依朱文公家禮父母之喪率皆廬墓三年有不謹者不齒士列其間或有啜粥終喪不食鹽菜或手自炊爨以供奠事婚娶必通媒納采不娶同姓士大夫皆立家廟四時必享忌日

則子孫不食肉祭其主於寢堂六品以上祭三代七品以下祭二代庶人只祭考妣若嫡長子無後則衆子衆子無後則妾子奉祀旁親無後者祔祭嫡妾俱無子者告官立同宗支子為後士族婦女夫死則守節終身士大夫妻亡者三年後改娶若因父母之命或年過四十無子者許期年後改娶 每歲王祀先農躬耕籍田以供粢盛 王妃享先蠶養蠶于後苑以率女工 每歲季秋王行養老宴參宴者皆除一級孝子順孫義夫拜餉之王妃宴婦人於內殿拜餉節婦皆有賜物年百歲以上者歲賜米堂上官以上年滿七十者功臣父母妻堂上官妻並

月致酒饌 二品以上年尊德邵者春秋賜宴謂之老英會 孝友節義烈女隨其行跡或賞職賞物或旌門復戶清白吏見存者褒獎身歿者子孫亦皆錄用戰亡人子孫亦存恤錄用 宗親大臣之卒舉哀輟朝遣官弔祭官庀喪事因公在外身死者亦致賻祭宗室雖秩卑期親以上亦皆弔賻營葬侍講官及臺諫勿論品秩高卑一皆賻給遭親喪者亦如之 設歸厚署備棺槨以周民間倉卒之需 敗常犯贓者婦人再嫁者書名三司其子孫不齒士類 五子登科者之親歲賜米歿則致祭贈爵 中文武科者賜恩榮宴 官給酒樂

以榮之名曰榮親宴歿則設祭謂之榮墳中第一名者賜米
凡民因貧乏過期未葬者昏嫁失時者皆給資財飢寒孤獨者
與老而無托者亦給衣料 宏文館官員更日直宿五日開講
筵宰相臺臣亦令輪參又有夜對以盡羣下之情 官至一品
年七十而係國家輕重者不許致仕賜教書几杖以優之 堂
上官實行二品以上職者視其秩追贈三代 士大夫及軍卒
父母年七十則一子歸養八十則二子歸養九十則諸子歸養
每歲夏月頒冰于宗親及文武堂上官堂上官年老在散者
活人署病刑獄囚人並給 歷代及本國忠臣孝子烈女所行

卓異者裒撰成書名曰三綱行實譯以方言廣頒中外使婦人
小子無不曉解 國中設成均館及設養賢庫常養生員進士
五百人景年居館力學篤行而屢舉不中年滿五十者敘職雖
非生員進士通小學四書一經者亦升補于館東西四坊各有
學舍教卿大夫子弟及凡民俊秀年八歲以上閭巷小童不得
肄學者設童蒙教誨 州郡亦設鄉校皆倣成均四學之制觀
察使巡到其邑師長儒生皆試講製課勤惰以勸懲春秋釋菜
觀察使守令親行之又大饗儒生 成均館儒生每歲春秋議
政府六曹諸館閣堂上官命題製述科次置簿優等者三人直

赴文科覆試 成均館升補儒生及四學諸生每年六月定考
官逐日製述或講論通考優等者五十人許赴生員進士覆試
諸道亦然 世子逐日問安視膳與師傅賓客僚屬日三講論
凡接師傅時下階迎送每月十五日會講必設大餉一書講畢
則大設宴餉又有賜物 新除授京外堂下官職者參謁于議
政府吏曹屬曹母過十日 立崇義殿以前朝王氏之後主之
給廩祿祭田以奉其祀 前代新羅百濟高句麗王陵官禁田
柴 歷代始祖及有功德及民者皆立廟降香祝令所在官春
秋致祭 設厲壇于北郊漢城府官每春秋徧祀無主孤魂州

郡亦如之 囚人冬月則給鋪席夏月則淨脩獄中洗灑枷杻
使無寒凍熏蒸之患又定醫官備藥物救之貧不能養獄者官
給廩料 京外置常平倉穀貴則增價以買布穀賤則減價以
賣布以濟窮民又置別倉當春貸民以贍耕種秋償其數以備
來歲每年以為常若值水旱凶歉則在在設賑濟場以救之
郡縣每歲春秋行鄉飲酒禮又京外小民每里立鄉長家出米
布使鄉長掌之春秋設酒共會以申其好謂之講信凡有疾病
患難交相救護若有死喪備棺槨葬需以庇之 曾經三品職
及臺諫侍讀官者子孫承蔭每歲正月試才補官無蔭者之子

孫擇其俊秀許三品以上宮保舉吏曹更試經書隨才補闕若不稱職并罪舉主 科舉每于子午卯酉年為之設三場初場試論義二篇中場試賦表二篇終場策問會試則初場講四書五經能通者許赴中場試賦表記中二篇終場策問通考取之殿試則策時務以第高下若遇大慶及王親幸學宮則有別舉王時時親行釋奠或不時幸學與師儒講論或橫經問難或行大射禮或親策儒生 凡中科者殿庭唱榜御前賜酒賜花與蓋優人呈戲鼓吹前導三日遊街以榮之若幸學試取即日唱榜者拜賜鞍馬袍笏尤以為榮聖節及正至王率世子百官行

望 闕禮每遣使上表時王率世子百官行焚香四拜禮王親捧 表跪授使者仍下庭鞠躬具黃屋儀仗以出祇送郊外我國赴 京使臣或賚奉 勅書回還之時結綵棚迎郊外一如 華使凡進

獻禮物王親自檢視 宗親年滿十五入宗學受業每日抽籤講習讀以為課勸 禮曹每月考講四學諸生所讀書 京外儒生逐日所讀及其師職姓名簿錄藏于禮曹每科舉後所訓儒生中及第三人或生員進士十人以上者加階 祭服朝服

夏前集原書
公服一依華制 每四時八節日及季夏土旺日鑽木改火
遺失小兒漢城府本邑保授願育人官給衣料

古都

開城府本高句麗東北忽高麗始祖自鐵原徙都廣州本百濟
始祖溫祚王右都

右今皆屬京畿

稷山

本慰禮城百濟始祖溫祚王高句麗東明王第三子東明王
薨避琉璃王自卒本扶餘南奔開國建都于此

公州

本百濟熊川郡文周王自北漢山城徙都至聖王移南扶餘
扶餘縣

本百濟聖王自熊川來都號南扶餘義慈王時新羅金庾信
與蘇定方攻滅之唐師既去新羅盡得其地

右今皆屬忠清道

全州

甄萱建都於此稱後百濟

益山

本馬韓國後朝鮮王箕準箕子四十一代孫也避衛滿之亂
浮海而南至韓地開國仍號馬韓百濟始祖温祚王并之

濟州

本耽羅國或稱毛羅在全羅南海中

右今皆屬全羅道

慶州

新羅古都始祖赫居世開國建都

高靈縣

本大伽倻國自始祖伊珍阿豉王至道說智王凡十六世五

百二十年新羅滅之

金海府

本駕洛國或稱伽倻後改金官國自始祖首露王至仇亥王
凡十世四百九十一年仇亥降于新羅

東萊縣

古長山國

義城縣

古召文國

清道郡

本伊西國

慶山縣

本梁國

尚州

本沙伐國

開寧縣

本甘文國

咸昌縣

本古寧伽倻國

咸安縣

本阿尸良國

固城縣

本伽倻國并為新羅所取

右今皆屬慶尚道

江陵府

本穢國漢武帝元封二年遣將討之定為臨屯郡

三陟府

本女直國降于新羅

春川府

本貊國

鐵原府

本高句麗鐵圓郡弓裔起兵取之自松岳郡來都國號泰封
右今皆屬江原道

平壤府

本三朝鮮高句麗之故都唐堯戊辰歲有神人降太伯山檀
木下國人立為君都平壤號檀君是為前朝鮮周武王克商
封箕子于此是為後朝鮮傳至四十一代孫準燕人衛滿奪

其地都王險城即平壤是為衛滿朝鮮其孫右渠時漢武帝
遣將討之以王險為樂浪郡

龍岡縣

本古黃龍國為高句麗所并

成川府

本沸流王松讓故都高句麗始祖東明王自北扶餘來都卒
本川松讓以其國降

右今皆屬平安道

古跡

面嶽

右京都中高麗肅宗六年命崔思諷尹瓘等相南京之地思諷還言臣等就盧原驛海邨龍山等處審視山水不合建都唯三角山面岳之南山形水勢符合古文請于主幹中心壬坐丙向隨形建都從形勢東至大峯南至沙里西至岐峯北至面嶽為界面岳即白岳

馬巖影殿

在開城府成均館前高麗恭愍王為魯公主大營影殿于此窮極奢麗今有遺址

九齋學堂

古基在府北松岳山紫霞洞高麗顯宗以後干戈纔息未遑文教文憲公崔冲收召後進教誨不倦學徒空集遂分九齋曰樂聖大中誠明敬業造道率性進德大和待聘謂之侍中崔公徒凡應舉者必詣徒中學焉及冲歿後凡赴舉者亦皆隸名九齋籍中謂之文憲公徒東方學校之興蓋由冲始

滿月臺

在松岳山下高麗延慶宮正殿前階也遺基尚存

延福亭

古基在府東大門外山臺巖下高麗毅宗聞城東沙川龍淵寺南有石壁數仞削立龍川曰虎巖流水渟瀦樹木蓊蔚命內侍李唐柱等構亭其側名曰延福竒花異草列植四隅以水淺不可舟築堤為湖日泛舟酣宴徹夜不止羣臣皆大醉挿花倒載而還或沉醉忘歸衛士甚怨卒致難

歸法寺

古基在府炭峴門外崔冲每歲暑月借此寺之僧房為夏課擇徒中及第學優未官者為教導授以九經三史間或先進來過刻燭賦詩勝其次第唱名以入設小酌童冠列左右奉

樽俎進退有儀長幼有序相與酬唱及日暮皆作洛生詠以罷誤者莫不嘉歎

右畿內

弓樹

在光州南門外枝幹輪囷大數十圍高七十餘尺邑人以發葉早晚占年之豐歉今枯

崔氏園

在靈巖郡西諺傳新羅人崔氏園中有瓜長尺餘一家頗異之崔氏女潛摘食之歎然有娠彌月生子其父母惡其無人

道而生置之竹林居數七日女往視之鳩鷲來覆翼之還告于父母父母往見異之取而養之及長祝髮為僧名道詵入唐傳一行禪師地理之法而還踏山觀水多有神驗後名其地曰鳩林

毛興穴

在濟州南二里高麗史古記云厥初無人物三神人從地湧出長曰良乙那次曰高乙那三曰夫乙那三人遊獵荒僻皮衣肉食一日見紫泥封木函浮至東海濱就而開之內有青衣處女三及諸駒犢五穀種三人以歲次分娶之始播五穀

且牧駒犢子孫蕃盛今州鎮山北麓有穴是其地也

右金羅道

泡母臺

在忠州風流山高數十丈諺傳昔有仙女名薔薇自號泡母常遊其上香滿一洞唐明皇聞之遣道士迎入宮號真完夫人

天政臺

在扶餘縣北十里許江北絕巘有巖如臺下臨江水諺云百濟時欲拜宰相則書當選者名函封置巖上須臾取看名上

有印迹者為相故名或稱政事巖

釣龍臺

縣北扶蘇山下有一怪石跨千江渚石上有龍攫之跡諺傳蘇定方伐百濟臨江欲渡忽風雨大作以白馬為餌而釣得一龍須臾開霽遂渡師伐之故江曰白馬巖曰釣龍臺

落花巖

釣龍臺西有巨巖諺傳百濟義慈王為唐兵所敗宮女奔迸登是巖自墮于江故名

蘇定方碑

在縣西二里唐高宗遣定方與新羅金庾信伐百濟滅之立

石紀功

右忠清道

始林

在慶州府南新羅脫解王夜聞始林樹間有鷄鳴聲遣人視之有金色小犢掛樹枝白鷄鳴于其下王取犢開之有小男兒在王喜曰此豈非天遺我令亂乎乃收養之名曰闕智以其出於金犢故姓金氏因名其林曰鷄林因以為國號

琴松臺

琴松臺

在府金鰲山頂新羅人玉寶高遊樂之處寶高入智異山學
琴五十年自製新調三十四曲彈之有玄鶴來舞遂名玄鶴
琴又云玄琴世傳寶高得仙道

鮑石亭

在金鰲山西麓鍊石作鮑魚形故名焉流觴曲水遺跡宛然
後百濟甄萱攻燒高鬱府逼至郊畿時新羅景哀王與妃嬪
宗戚出遊鮑石亭置酒娛樂忽聞兵至倉卒不知所為王與
夫人走匿城南離宮從臣伶官宮女皆被陷沒萱縱兵大掠
入處王宮令左右索王逼令自盡強辱王妃縱其下亂其嬪

妾立王表弟金傳為王

瞻星臺

在府東南新羅善德王時鍊石築臺上方下圓高十九尺通
其中人由中而上下以候天文

月明巷

在府金城南新羅憲康王遊鶴城至開雲浦忽有一人奇形
詭服詣王前歌舞讚德從王入京自號處容每月夜歌舞于
市境不知所在時以為神其歌舞處後人名為月明巷因作
處容歌處容舞假面以戲

萬波息笛

新羅神文王時東海中有小山浮來隨波往來王異之泛海入其山上有一竿竹命作笛吹此笛則兵退病愈旱雨雨晴風定波平號萬波息笛歷代傳寶之至孝昭王加號萬萬波波息笛今亡

玉笛

長尺有九寸其聲清亮俗云東海龍所獻歷代寶之傳至於今

玉帶

新羅真平王元年有神人降於殿庭謂王曰上帝命我傳賜玉帶王跪受凡郊廟大祀皆服之

井田

在府地新羅時遺基尚存

上書莊

在金鰲山北高麗始祖之興新羅崔致遠知必受命上書有雞林黃葉鵠嶺青松之語羅王聞而惡之致遠即帶家隱居伽倻山海印寺終焉其鑑識之明羅人服之乃以其所居名上書莊

黃龍寺

在府月城東新羅真平王命所司築新宮於月城東黃龍現其地王疑之改為佛寺號曰黃龍有率居者於寺壁畫老松根幹鱗皴枝葉盤屈烏雀往往望之飛入及到蹭蹬而落歲久色暗寺僧以丹青補之烏雀不復至

題詩石

在陝川郡海印寺洞俗云紅流洞洞口有武陸橋渡橋向寺而行五六里計有崔致遠題詩石其詩曰狂噴疊石吼重巖人語難分咫尺間常恐是非聲到耳故教流水盡籠山後人

因名其石曰致遠堂

讀書堂

在郡伽倻山世傳崔致遠隱伽倻山一朝早起出石遺冠履於林間莫知所歸海印寺僧以其日薦冥禧寫真留讀書堂堂之遺址在寺西

瓜亭

在東萊縣南高麗鄭敘被譖歸田里乃築亭種瓜撫琴作歌以寓戀君之意詞極悽惋自號瓜亭其歌詞至今傳於樂譜

右慶尚道

棘城

在黃州南二十五里高麗人防紅巾於此盡為賊所殲累經兵燹白骨暴野天陰雨濕鬼物煩冤薰為厲氣轉相侵染民多夭札國家春秋降香祝致祭其患遂絕

弓多窟

在海州東三十里其窟圓徑二丈餘穴暗人持火乃入至五里許其穴窟曲幽深且有水不能窮源諺傳弓多將軍入此穴達於九月山頂之穴相距百餘里窟內燃火至十餘日則燃氣出於九月山穴

右黃海道

石竈

石池

石井

俱在江陵寒松亭旁四仙游憩之時茶具也

酒泉石

在原州酒泉縣南道旁有石狀如半破酒槽者世傳石槽舊在西川邊就而飲者無不足焉邑吏憚於往來欲轉置於縣眾共移之忽大雷震石碎為三一沉於淵一不知所在一即

此石也

右江原道

麒麟窟

在平壤府浮碧樓下東明王養麒麟馬於此後人立石誌之
世傳王乘麒麟馬入此窟從地中出朝天石升天其馬蹟至
今在石上

井田

在府外城內箕子區畫井田遺蹟宛然

青雲橋

白雲橋

俱在府九梯宮基內東明王時梯也

右平安道

朝鮮志卷下

山川

三角山

在京畿楊州之境一名華山一名負兒岳自江原道平康縣
之分水嶺連峯疊嶂起伏迤邐西至楊州西南為道峯山又
為三角山實京城之鎮山也

白岳

在京都宮城北

仁王山



在白岳西

白雲洞

在仁山麓

木覓山

即都城南山一名引慶山

唐脩撰臯易覓以蜜

蠶頭峯

又名龍頭峯大明一統志稱龍山在楊花渡東岸即此孤立不甚高然入江心斗斷四望曠濶無礙為勝最絕故著稱焉

漢江

在木覓山南古稱漢山河新羅時為北瀆載中祀高麗稱沙平渡其源出江陵五臺山至忠州西北與達川合至原州西與安昌水合至楊根西與龍津合至廣州界為渡迷津為廣津為三田津為豆毛浦至京城南為漢江渡自此而西流為露梁為龍山江又西為西江至衿川北為楊花渡楊川北為孔巖津至交河西與臨津合通津北為祖江入於海

龍山江

在都城西南十里慶尚江原忠清京畿上流漕轉皆集於此商船賈舶往來不絕

西江

在都城西十五里黃海全羅忠清京畿下流漕轉所集之地
楊花渡

即西江下流

楮子島

在三田渡西江水歧為二派環島洄伏而出島上松林蔥鬱
其中寬平可居石泉湧出最為幽絕

栗島

在麻酒南蒔藥種栗

箭郊

在都城東七八里許三面圍山一面帶水平蕪極目水草肥
饒官馬放牧之地有亭曰華陽取歸馬華山之義
右都城近處

冠嶽山

在果川西五里鎮山

青溪山

在廣州西五十里

松岳山

開城府鎮山又稱鵠嶺在府北五里

紫霞洞

在松岳山下洞府幽阻漢水清漣殊為蕭洒

進鳳山

在府東南內外杜鵑花盛開世稱進鳳山躑躅

天磨山

在府北諸峯峭崿插天望之凝翠謂之天磨

聖居山

在府西北黃海道牛峯縣境與天磨山相連一名九龍山又

名平那山有五峯其峯名有小菴稱五聖昔聖骨將軍居扶
蘇山右谷一日與同里九人捕鷹會日暮就宿岩竇有虎當
竇口大吼十人相謂曰虎欲啗我輩試投冠使見攬者當之
遂投之虎攬聖骨冠聖骨出欲與虎鬪虎忽不見而竇崩九
人皆不得出聖骨還報平那郡郡人來葬九人先祀山神其
神見曰予以寡婦主此山幸遇聖骨將軍欲與為夫婦共理
神政請封為此山大王言訖與聖骨俱隱不現郡人因封聖
骨為大王立祠祭之以九人同亡改山名曰九龍聖骨之孫
實育出家入智異山脩道還居此山之北岬

大興洞

在天磨聖居兩山之間樹木翳鬱泉石光潔夏則綠陰蓋地
木蓮花開清香滿洞秋則赤楓黃葉倒映水底真佳境也

朴淵

在天磨聖居兩山之間狀若石瓮窺之正黑有盤石湧出中
心曰島巖水赴絕壁怒瀑下垂可十餘丈宛如白虹映空飛
雪洒缸庭奔電激聲震天地謗傳昔有朴進士者吹笛淵上
龍女感之引以為夫故名朴淵其母來哭墜死下潭遂名姑
姆潭淵上有神祠遇旱禱雨輒應高麗文宗嘗遊此登島崑

上忽風雨暴作石震動文宗驚怖時李靈幹扈從作書數龍
之罪投於淵龍即出其脊乃杖之淵水為之盡赤

五鳳峯

在開城府峯下有寺名曰甘露高麗李子淵入元朝登潤州
甘露寺愛湖山勝致謂從行三老約曰肅宜審視形勢載胸
臆間及還與三老約曰天地間凡有形者無不相似况我國
山川清秀其形勢豈無與京口相近者乎汝宜以扁舟短棹
無遠不尋當以十年為期三老曰唯凡六涉寒暑始得之於
府城西湖潤州甘露寺雖美但營構繪飾之工特勝耳至於

天作地生自然之勢殆未及此凡樓閣池臺之制度一
之

禮成江

在府西三十里高麗朝宋皆於此發船故謂之禮成

碧瀾渡

在府西三十六里宋史自急水門又三日抵岸有館曰碧瀾
亭由此登陸崎嶇四十餘里乃其國都者是也今稱息波亭

天寶山

在揚州東二十五里山有檜若寺高麗時西域僧指至到此

云山水之形宛同天竺阿蘭陀之寺後僧懶翁始建寺未畢
而死其徒覺田等訖工為屋凡二百六十二間棟宇像設宏
狀美麗甲於東方

驪江

即漢江上流在驪州客館北臨江有樓曰清心沿江有長林
白八大藪周十餘里登樓望之如在畫圖中

龍門山

在楊根郡東三十三里一名彌智山

月溪遷

在郡西三十里縈紆山腹下臨江水俗稱棧道為遷

五冠山

在長湍府西三十里山頂有五峯團圓如冠故名高麗人事母至孝居山下去京三十里為養祿仕朝出暮返告面定省不少哀歎其母老作木雞歌名曰五冠山曲傳于樂譜山下有靈通寺洞府深邃山勢周遭流水漫迴樹木蓊鬱其西樓勝槩為松都第一

遮日巖

在五冠山下綿細洞口有巖石平廣可坐鑿石為窠白人言

古人張幕立柱處為云仙人所遊或云君王所幸有泉盤回其駛如箭其下為泓泓底皆石羣魚潑刺歷歷可數

花巖

在五冠山下靈通洞口一名花潭左有翠壁峭立如展畫屏岩隙有躑躅當春亂發紅映水底潭右有小崑四面如削其上四隅亦有張幕窠白

湧巖山

在五冠山東北山與天磨聖居諸山相連絕壁削立三面如削岩巖之間有寺名曰洛山惟南面獨開恍如天造寺東有

一獨峯高插霄漢上戴盤石曰正瓶臺寺南又有一峯曰香
爐峯成化乙酉春夜有聲如雷寺僧皆震怖明日視之則寺
後石岡自折移立東門外屹然與兩峯鼎峙

寶鳳山

在府西二十里檜嶺東山勢如鳳騫舞故名

石壁

府東三十里有長湍渡一名頭耆津即臨津上流兩岸青石
壁立周遭十里清江瀉其中瑩徹可鑑春花秋楓紅綠倒影
乘舟望之宛如仙境

臨津渡

在府南三十七里其源出咸鏡道安邊府界

扶蘇山

在豐德郡十五里山有敬天寺有石塔十三層刻十二會相
人物聳動形容森爽其制作精巧天下無雙諺傳元脫脫丞
相以為願刹晉寧君姜融募元朝工匠造此塔至今有脫脫
姜融畫像又寺之東岡彥怪石俗謂之沉香石

孔巖津

一名北浦在陽川有巖立水中有竇因以為名高麗恭愍王

時有民兄弟偕行弟得黃金二錠以其一與兄至津同舟而濟弟忽投金於水兄怪而問之荅曰吾平日愛兄篤今而分金忽萌忌兄之心此乃不祥之物不若投諸水而忘之兄曰汝之言誠是矣亦投金於水

右京畿

屏風山

在清風北一里蒼壁削立如屏周遭五六里大川縈迴其下山腰有風穴

城山

在永春縣南三里山下有石窟高丈餘廣可十餘尺許深入無際涯有水混混而出深可沒膝清冷如冰邑人持炬十柄而入穴猶未竟炬盡而返

椒水

在清州東其味如椒而冷似冰落則已疾

俗離山

在報恩縣東九峯突起亦名九峯山新羅時稱俗離岳躋中祀山頂有文藏臺疊石天成巖巖聳空其高不知其幾丈其廣可坐三千人臺上有坎如鑊其中有水泥混旱不縮雨不

分為三派流沂半空一派東流為洛東江一派南流為錦江
一派西流而北為達川入于金遷山下有八橋九遙之號山
之南岸紆餘開豁自此至彼望之遙遙疑其地盡而至則又
望遙遙如此九轉而乃抵于法住寺故名九遙九遙之中一
水回環曲轉每曲有橋總八故名八橋第一橋曰水精橋橋
上有飛閣人從閣中行

黃山

一云天護在連山縣東新羅金庾信將兵與唐蘇定方攻百
濟百濟將軍階伯禦羅兵于黃山之野設三營四戰皆勝兵

寡力屈而死甄萱從高麗太祖討其子神劔神劔兵敗而降
萱憂懣發疽數日卒於黃山佛舍

白馬江

在扶餘縣西良丹浦及金剌川與公州之錦江合流為此江
入林川郡界為古多津

藏軍洞

在石城縣北洞門曲狹行人見之疑若無洞深入其內極廣
濶可藏萬餘兵世傳唐將蘇定方代百濟時藏兵於此故因
以為號

元帥山

在燕岐縣南高麗忠烈王十七年哈丹侵軼王請兵于元世祖遣平章薛闡千領兵來助王以韓希愈金忻等將三軍偕元兵與丹戰于縣北清川之界正左山下大捷追至公州熊津伏尸三十餘里斬獲不可勝計俗至今呼駐軍之地為元帥山

溫泉

在溫陽郡西水熱如沸湯療病有效

右忠清道

開雲浦

在蔚山郡南新羅憲康王遊崔城至海浦忽雲霧晦冥迷失道禱于海神開霽因名焉

七點山

在三叉水之間山有七峯如點故名世傳駕洛時崑始仙人所遊之地

金井山

在東萊縣北山頂有石高可三丈上有井圓十餘尺深七寸許有水常滿旱不竭色如黃金世傳有一金色魚乘五色雲

從天而下游泳其中以此名其山

溫井

在縣北其熱可熟雞子帶病者浴之輒愈新羅時王屢幸於此甃石四隅立銅柱其穴猶存

內迎山

在清河縣北山有大中小三石鼎列于岩上人稱三動石以手指觸之則微動兩手據撼則不新羅真平王避甄萱亂于此

此山

龍頭山

在寧海府西二十里其頂有井水旱無增減俗傳初山頂有一葦長至天乃鑿井其地水甚清激邪人照之則變為泥也

冰山

在義城縣東南四十里大巖下有石穴穴口高三尺廣四尺八寸橫入五尺一寸是為穴又有穴在岩底直下廣一尺深可量處方一尺其下回曲深淺難量立夏後冰始凝極熱則冰堅霽雨則冰釋春秋不寒不熱冬則溫氣如春是為冰穴

鼇山

在清道郡南二里鎮山東有一谷名曰高沙洞天將風雨先

期而鳴噴出雲氣雲入洞內則雨雲出洞外則風大鳴則即
日有驗小鳴則二三日乃驗

華山

在義興縣東三十里山麓有風穴廣三尺二寸長二尺八寸
風自穴出甚寒夏初必冰

洛東江

在尚州東三十六里聞慶龍淵及軍威并川諸水至州之東
北合于龍宮河豐津南流為洛東江入善山府界自此至八
海雖隨地異名而總稱洛東江又稱伽倻津

恭儉池

在州北二十七里高麗時司錄崔正份因舊址築之堤長八
百六十步周一萬六千六百四十七尺民賴灌溉之利池中
蓮花盛開香風聞數里菱芡被洲渚縣之士人環池置亭榭
以遊焉

鯉埋淵

在善山府東十二里東岸有奇岩岩下有龍穴天旱先燔柴
於冷山之頂繼沉虎頭於此或祭龍以禱輒應

烏嶺

在聞慶縣西二十七里俗號草岵與豐基竹嶺俱為南道雄

關今山之南有古蹟其山為古蹟也

龍湫 在鳥嶺下桐華院西北一里有瀑布四面及底皆石其深不

測俗傳龍騰處

曦陽山

在縣南十五里有古城三面皆石壁古右軍倉洞府深邃泉

石絕勝

串岬遷

在縣南二十二里即龍淵之東崖一名免遷鑿石為棧道縈

紆屈曲幾六七里俗傳高麗始祖南征至此不得路有免緣

崖而走遂開路以行因稱免遷其北斷峯有石城遺址古之

防戍處

伽倻山

一名牛頭山在陝川郡北高麗始祖將興崔致遠上書有雞

林黃葉鵠嶺青松之語新羅王惡之致遠即帶家隱于伽倻

山之海印寺

吟風瀨

泚筆巖

俱在海印寺洞是地攢峯四時怒浪噴風聲如陣馬巨石臨溪苔蘚不蝕滑如磨礮可施鈇毫故名皆致遠所遊處致遠即入唐為高駢幕下作檄黃巢書者也

水落巖

在龍川縣東十三里栗川峴山南溪水入山腰岩石間作瀑布數十丈分三派直下垂土人以為全羅道將旱則西派竭慶尚道將旱則東派竭忠清道則中派絕流以此占來歲水旱

右慶尚道

萬景臺

在全州府東南十里高德山北麓有石峯竒秀狀如層雲其上可坐數十人四面林木森鬱石壁如畫西望郡山島北通箕準城東南負大山氣象千萬

羣山島

在萬頃縣西海中周六十里迴迆可以藏船凡漕運往來者皆候風於此島中有大塚如君王陵者大明一統志十二峯連絡如城舊有客館曰郡山亭及五龍山廟

邊山

在扶安縣西二十五里一名瀛洲山峯巒盤曲百餘里重疊高峻岩谷深邃宮室舟船之材自高麗皆取于此俗傳虎豹見人即避夜行無阻

無等山

在光州東十五里鎮海一云武珍岳一云瑞石山穹窿高大雄盤五十餘里濟州漢拏山慶尚道南海巨濟等島皆在眼底山西陽崖有石條數十櫛立高可百尺山名瑞石以是也天旱欲雨與久雨欲晴山輒鳴聲聞數十里

月出山

在靈巖郡南五里諺稱小金剛山

九井峯

月出山最高頂有岩屹立高二丈旁有一穴僅容一人從其穴而上其巔可坐二十人其平處有凹而貯水如盆者九號九井峰雖旱不竭諺傳九龍所在

動石

九井峯下有三石特立層岩之上高可丈餘周可十圍西負山巔東臨絕壁其重雖用千百人不能動搖而一人搖之則

欲墜而不墜故亦稱靈石郡之得名以此

漢擎山

在濟州南二十里鎮山其曰漢擎者以雲漢可擎引也其巔有大池人喧則雲霧咫尺不辨五月雪猶在八月乃襲裘

明月浦

在州西六十里海口可泊船

財巖

在明月浦西五里其形如屋穹隆其上鋪白沙其下有大穴人以炬入其中寬廣可八十步許產石鐘乳其西北有二岩

名小夾財俱產石鐘乳其中寬廣亦五十步許

智異山

在南原府東六十里山勢高大雄據數千里女真白頭山之脉迤延至此故又名頭流一名方丈杜詩方丈三韓外註及通鑑皆云方丈在帶方郡卽南原之南者是也新羅為南岳躋中祀環山而居者凡十數州其北則咸陽其東南則晉州其西則南原奇峯削壁不可勝算天王峯般若峯最高山腰或有雲雨雷電其上則晴朗諺傳太乙居其上羣仙之所會龍象之所居也東南之山智異金剛最雄大山東有斷俗寺

崔致遠讀書處

青鶴洞

在智異山中路甚隘狹纔通一線人乃曲躬而行經數里許乃得虛曠之境四隅皆良田沃壤宜播植唯青鶴棲息其中故以名焉蓋古之遁世者所居頽垣壞塹猶在諺傳崔致遠所遊處

馬耳山

在鎮安縣南七里有一石山雙峯聳立名曰湧出峯東曰父西曰母相對如削成高可千仞其頂樹木森鬱四面峻絕人

不能升惟母峯北崖可升諺傳東峯上有小池西峯頂平濶有泉可避寇天旱禱雨有應新羅稱西多山載小祀我恭定王南幸次山下遣官致祭以形似賜名馬耳山

右全羅道

急水門

在黃州西三十里海口州及龍岡安岳之水相激處

慈秀山

在平山府北三十里董侍講越奉使到此作記立碑以刻

慈悲嶺

在瑞興府西六十里一名岳嶺自平壤通京都舊路也多虎
害路遂廢今由棘城路以行

吾助川

在牛峯縣興義驛南源出聖居山源入楮灘岸上有石迤邐
如屏高丈餘甚奇偉

龍潭

在遂安郡有巖如口噴出清泉淙淙而流淵淪成深淵冬不
冰旱不竭雨亦不溢崖石高起可坐五六人毫髮皆鑑穴轉
而阨狀若咽喉莫敢窺其源

九月山

在文化縣西十里即阿斯達山一名弓忽一名甌山一名三
危世傳檀君初都平壤又移白岳即此山也周武王封箕子
于朝鮮檀君乃移於唐藏京後還隱此山化為神

白沙汀

在長淵縣西五十八里長七八里廣三四里南有蓮池北有
勝仙峯峯頭有莎草三面濱海白沙平鋪隨風流轉堆積成
岸稚於海棠紅翠相映遊賞者相屬

右黃海道

五臺山

在江陵府西一百四十里東滿月南麒麟西長嶺北象王中
智爐五峯環列大小均敵故名之

于筒水

在五臺山西臺之下有泉湧出即漢水之源

仙遊潭

在杵城郡南十一里許山麓周遭成谷谷中有潭曰仙遊有
小峯斗起半入湖心上有長松數株舊有亭今廢春則躑躅
挾巖亂發夏則蓴菜滿潭

永郎湖

在郡南五十五里周三十餘里汀回渚曲巖石竒怪湖東小
峯半入湖心有古亭基是永郎仙徒遊賞之地

烈山湖

在郡烈山縣東二里有大湖周數十里包跨陵谷北諸湖最
大諺傳昔大水包烈山之谷新羅構山麓而舊縣沉在水底
天晴波靜則牆壁依然可見

鳴沙

在郡南十八里沿海沙平皓若雪色人馬行則觸之有聲錚

身臨程廩書
錚如金磬響大抵嶺東皆然而杵杵高城之間最多海棠間
發紅白相映

浦口山

在高城郡東九里高城浦有岩斗起層疊如階其上可坐百
餘人岩北又有一峯皆石東望海中五里許有石拳如列屏
峯下有石龍拏虎攫竒怪異常又有二石相對如人偶語石
皆白色輝映碧海望之如畫

三日浦

在郡北七八里外有重峯疊嶂合包而內有三十六峯洞壑

清淵松石竒古水中有小島蒼石盤陀其上虬松鋪陰梨花
亂開湖水明瑩可鑑非烟火食者所堪至昔四仙遊此而三
日不返故得是名水南又有小峯峯有石龕峯之北崖石面
有丹書六字曰永郎徒南石行書畫入石風磨雨洗宛然如
新

昭陽江

在春川府北六里源出麒麟之瑞和縣與府之麒麟縣水合
流至楊口縣南為草沙里灘又至府東北為青淵為舟淵為
狄岩灘為昭陽江

寒溪山

在麒麟縣東五十里山下有城有川自城中流出即成瀑布而下懸流數百尺望之如白虹垂天自圓通驛而東左右皆大山洞府深邃溪水縱橫而渡者三十六樹木如箒上竦雲霄旁無橫枝松栢尤高不見其巔又其南峯作絕壁其高千仞奇怪莫狀禽鳥不能飛度其下清泉觸巖成潭盤石平行可坐又東數里洞口甚狹細徑緣崖窵穴哈呀峯巒峭拔如龍拏虎攫如累層臺者無數其形勢甲於嶺西

金剛山

在淮陽府東一百六十七里山名有五一日金剛二曰皆骨三曰涅擊四曰楓岳五曰怙怛白頭山南條也自會寧府之弓羅漢峴至甲山東為頭里山永興西北為劍山府之西南為分水嶺西北為鐵嶺通川西南為楸池嶺至長楊之東高城此山自分水嶺至此凡八百三十餘里山凡一萬二千峯巖竅骨立東臨滄海杉檜參天望如畫圖有日出月出二峯可見日月之出內外山共有百八寺表訓正陽長安摩訶衍普德窟榆岵最為名刹云

萬瀑洞

在金剛山中百道流泉湧出谷中其狀非一故名谷口有峯
曰玉人峯人言青鶴棲其限有一泓曰觀音潭潭畔石崖蒼
苔滑足人皆挽籐蔓乃得過其名曰手中崖石心有凹如杵
曰諺傳觀音浣悅處至普德窟前飛湍縈石來觸崖竅飛雪
噴激晴晝欲暝石底水蔚如翠藍尺數步怒瀑飛珠散雪噴
薄而下其大者凡十二層其小者不可勝計故曰萬瀑洞其
下曰珠淵又有一石形如龜伏潭中曰龜潭又有一潭深不
可測曰火龍潭其上有峯曰獅子岩洞有普德窟鑿絕壁架
枝立銅柱于外以構小屋三楹于其上名曰觀音門抱以鐵

鎖釘于巖石浮在空中人登則搖中置佛函飾以珠玉外施
鐵網以防手摸

右江原道

龍興江

在永興府東北二里古名橫江其源有四一沸流水一出馬
踰嶺一出艾田峴一出陽德縣境居次嶺至庫岩與松魚灘
合名橫川過龍神堂至鎮靜寺西絕壁下名鶴鷓淵下有廣
灘中有白石形如白馬以石隱見知水深淺經邑城東北為
此南流入海

國島

在安邊府東六十里島去岸十里許入自西南隅水際白沙如練其下平地五六畝形若半壁中有屋基人言浮圖者所居也其上山圍若映勢不甚高蔓草覆之又無樹木視之一土坡也舟而沙西崖岸稍異其崖石則皆方直櫛比而壁立其岸石則皆平圓排列一面可坐一人然不整齊也行數百步其屋高可數百尺其石白滑方直長短若一皆井井離立每一條其頂各戴一小石若華表柱頭者仰面而視可竦可愕有一小窟撐舟而入漸窄不能容舟視其窟深不可測其

左右東立之石如外面更整齊其上石腳下垂者皆平正如覆棋局若一一鋸而斷之又有一面如圍屏者石與窟無異而崖不甚高其下稍平易其圓石排列者可坐千人遊觀者必憩息於此東南又行數百步厓石稍異作方鐵網盛水磨小圓石長五六十尺人謂鐵網石造物奇怪難以言殫

磨雲嶺

磨天嶺

俱在端川郡以其高峻勢入雲天故東北雄闕

白山

在鏡城府西一百十里山勢甚峻至五月雪始消七月復有
雪山頂樹木矮小土人亦謂之長白

白頭山

在會寧府西七八日程山凡三層高二百里橫亘千里其巔
有潭周八百里南流為鴨綠江北流為松花江為混同江東
北流為蘇下江為速平江東流為豆滿江大明一統志東流
為阿也若河疑指速平江也

右咸鏡道

錦繡山

在平壤府五里鎮山山下有高麗長樂宮基

牡丹峯

在錦繡山

德巖

在大同門下屹然能捍水故府人德之而名

酒巖

在府東北十里諺傳酒流出巖間遺痕尚在因而得名

大同江

在府東一里一名沮江又名玉城江其源有二一出寧遠郡

嘉慶年刊
加幕洞南流至孟山縣北又折而西流至德川郡界與三灘
合而南流至价川郡界為順川江至順川郡界為城岩津至
慈山郡界為禹家淵自北而東流至江東郡界為雜派灘一
出陽德縣北文音山西南流至城川府界為沸流江又折而
南流至江東縣界與雜派灘合流為西津江至府城東北為
馬灘至府城東為銀灘又為大同江自此而西流為九津瀾
水下與平壤江合流至中和縣西為梨津江至龍岡縣東出
急水門入海

白銀灘

在府東北四里

綾羅島

周十二里在白銀灘北

鳳德山

在安州東二十里山頂有九層鐵浮屠

清川江

一名薩水源出妙香山經安州北城下西流三十里與傳川
江入海隋宇文述等伐高句麗師渡薩水去平壤城三十里
因山為營因乙支文德詐降還軍至清川江軍半渡文德追

擊其後軍殺右屯衛將軍辛世雄隋軍俱沒所謂隋兵百萬化為魚者此也

堂於嶺

在定州西十五里郭山郡界

西門嶺

在嘉山郡西二里俗名石門嶺

鳳頭山

在郡北一里鎮山

白馬山

在義州南三十里諺傳白龍馬出遊故名

鴨綠江

在州西北一名馬訾一云清河一曰龍灣西去遼東都司五百六十里其源出胡地白頭山至州北於赤島東分三派一南流匯為九龍淵名曰鴨綠江水色似鴨頭故名之一西流為西江一從中流名曰小西江至黔同島復合為一至水青梁又分二派一西流與秋江合一南流為大江繞威化島至暗林串西流至彌勒堂復與伏江合為大摠江入于西海朱子曰女真起處有鴨綠江傳云天下有三處大水曰黃河長

江鴨綠是也高皇帝詩鴨綠江清界古封強無詐息樂時雍
逋逃不納千年祚禮義咸脩百世功漢代可稽明載冊遼征
須考照遺蹤清懷造到天心處水勢無波戍不攻

龍骨山

一名龍虎山在平安道龍川郡東八里鎮山西臨大海北望
鴨綠江江外松骨諸山如在几案之下最為絕勝

龍岩

在龍川郡西四十五里潮水往來岩上有龍爪痕

劍山

在宣川郡西二十里峯巒嵯峨如劍銳故名

凌漢山

在郭山郡東北七里鎮山大明一統志作熊花山

妙香山

在寧邊府東一百三十里一名太伯山山之太莫之與比地
多書木冬青仙人舊迹存焉

博川江

古稱太寧江大明一統志作大定江在博川郡西十五里源
出昌城府浮雲山過泰川縣合千安州之老江入于海

劍鶴山

在成川府東八里鎮山左右絕壁如劍如鶴故名十五里鎮

檜山

在成川北七十里石壁周三十里中有赤墳平行巨川橫流其下諺稱天作之城可容千兵

絕骨山

在府西北二里有攢峯十二世謂之巫山十二峯

沸流江

即卒本川俗稱遊車衣津在成川客館西三十步其源二一

出陽德縣吳江山一出孟山縣大母院洞至府北三十里合

流歷絕骨山下山底有四石穴水入穴中通流沸騰西出故

名沸流江又與慈山郡禹家淵合入于大同江

狄踰嶺

在江界府南二百六十九里熙川郡界即咸鏡道鏡城府白

山西麓西北雄關

右平安道

望樓臺

濟川亭

在都城南十里許前臨漢江後據木覓南對青溪冠岳諸山
望遠亭

在楊花渡北岸每歲省農及觀水戰處

樂天亭

在都城東十餘里乃春秋省農閱武之所

七德亭

在漢江西白沙汀春秋講武處

狎鷗亭

在豆毛浦南岸上黨府院君韓明澮別墅明澮常奉使入中

朝請名於翰林學士倪謙謙扁以狎鷗而為之記後復奉使
入中朝求詩於縉紳武靖侯趙輔等數十人亭名遂聞於中

朝

淡淡亭

在麻布東岸安平君別墅今廢

右都城近處

雲錦樓

在水原郡客館東樓前有池深廣夏月芙蓉盛開故名

清心樓

在驪州客館北俯臨驪江北有八丈藪西有笠岩高可二十餘丈上有松亭樓之東北五里許有神勤寺晨昏鐘磬常聞于樓中

迎賓館

在驪州客館東岸高爽開豁與清心樓相對俱為絕勝

臨津亭

在坡州臨津南岸

右京畿

雲錦樓

在江寧府客館北巋然傑特制度竒偉樓南可池深廣蒔以芙蓉池中有島島上種竹

勵節堂

在府館西北府使趙云佐有惠政邑人立祠祭之俗呼生祠

寒松亭

在府東十五里東臨大海蒼松鬱然亭畔有茶泉石竈石臼

即述郎仙徒所遊處

鏡浦臺

嘉善堂

在府東北十五里浦之周二十餘里水淨如鏡不淺不深纔
没人肩四涯中央如一西岸有峯峯上有臺臺畔有煉藥石
白浦之東口有板橋曰江門橋橋外有竹島島北有白沙河
周五六里許河外蒼海萬里直望日出最為奇勝亦曰鏡湖
海雲亭

在府鏡湖之南東臨蒼海

竹西樓

在三陟府客館西絕壁千仞奇岩叢列其上架樓曰竹西下
臨五十川川匯為潭水清徹底日光下透遊魚歷歷可數為

嶺東絕景

凌波臺

在府東十里海崖上有石數條立水中高可八九丈其上可
坐數十人

召公臺

在府瓦峴山上觀察使黃喜值歲荒專心賑活民無捐瘠既
還京民慕其德而相與就所憩之地累石為臺以寓甘棠之
思故名

秘仙臺

在襄陽府北雙成湖東有峯峭拔上有虬松數株望之如畫
上可坐數十人傍有細徑如線

祥雲亭

在府南傍海有長松連十里蒼翠成陰仰不見白日松間無
雜卉惟躑躅盛開爛如紅錦

月松亭

在平海郡東蒼松萬株白沙如雪松間禽鳥不棲諺傳新羅
仙人述郎等遊憩于此

望洋亭

在郡北東臨大海

萬景樓

在杆城郡清澗驛東有石峯突起其高數十仞上有虬松數
株東購小樓臺下亂石巉岩水清徹底風至驚濤濺石

茂松臺

在郡明波驛南有峯聳立海澨松林蔽日望之鬱然昔有茂
松府院君尹子雲奉使來遊因名焉

四仙亭

在高城郡北三日浦諺傳四仙來遊故名

叢石亭 在通州郡北有數十石柱高可八九丈離立海中石皆六稜如削玉方直平正如中繩墨者凡四處亭在海岸臨叢石故名諺傳新羅述郎南郎永郎安詳遊賞於此號稱四仙
凌虛樓

在蔚珍縣館東

七寶臺

在歙谷北有脩岡迤邐東蟠三面皆大湖湖水瀰漫外有大海小島森列海中者七故名

孤石亭

在淮陽府岩石竦立東臨淵水新羅真平王高麗忠肅王嘗遊此亭

錦江亭

在寧越郡錦障江岸繞壁之上東臨錦江南望金鳳淵虹之外有尚德村茅屋疎籬隱映桑柘間南有密積浦樹木葱鬱村烟水氣掩靄霏微望若圖畫

倚風亭

在旌善郡風穴之旁穴在大陰山岩石間寒氣颼颼其下置

冰則經夏不消
二樂樓
在春川府招陽江岸景致清絕

清虛樓

在府西石壁削立下有澄潭

右江原道

倚風樓

在慶州府西北壯麗軒豁

燕子樓

在金海府客館東北跨虎溪結構宏麗南有七點山三义河
一望可了

涵虛亭

在燕子樓北引虎溪為蓮池亭在池中極其清酒

將星樓

在昌原府兵馬節度使之營

撫夷樓

在巨濟縣在絕島中樓在縣西三十許海岸上

萬景樓

海晏亭

皆在縣西南水軍節度使之營後據峻嶺前臨大海

風詠樓

在尚州客館東北壯麗開豁

大和樓

在蔚山郡西數里有大川南流東折而入海到樓前水尤廣
濶翠岩陡斷岩隙有冬栢樹橫生側垂花間爛然東望海口
雲水接天淼茫無際

掣鼉亭

在郡東南水軍節度使營俯臨大海

雙碧亭

在梁山郡西城上城下有水水西有竹林水竹交映故名中
朝人張清有詩

澄心亭

在雙碧樓之北下鑑湖水神爽氣清故名

明遠樓

在永川郡客館東南三面敞豁下有大川南流樓東西皆有
堂東曰清涼西曰雙清

東水樓

曰新西曰雙

在郡西清通驛東南石崖上一水合流於其南境最清幽

海雲臺

在東萊縣東有山陡入海中若蠶頭挾路數里有冬栢杜椿
松杉蔥籠蒼翠四時如一春冬之交冬栢花落深沒馬蹄東
南臨大海新羅崔致遠嘗築臺遊賞遺蹟尚存

映潮樓

在安東府南五里江岸上高麗恭愍王南幸至府登此樓遂
乘舟上下仍書額賜之額至今猶在樓上

觀魚臺

在寧海府東海岸上俯臨大海極目無際風定波恬臺下遊
魚歷歷可數故名

嶺南樓

在密陽府館東山腰倚郭而構三面敞豁登覽曠然下有長
江江外有大野野有栗林蒼翠極目江流屈曲蜿蜒而走隱
見長林間虹明繡錯殆非人境其勝覽為嶺南第一故名樓
東有望湖堂西有臨鏡軒皆極洒落

秋月軒

在昌寧縣館西地勢高爽三面敞豁軒北有池池中有島

矗石樓

在晉州客館二里許宏敞軒豁長江在其下衆峯攢于外翠壁灑迤長洲聯亘江之南涯有巨竹千挺形勝景致與密之嶺南相甲乙樓東西皆有堂東曰凌虛西曰臨鏡其西又有雙清堂凌虛之東又有清心軒皆極清洒

學士樓

在咸陽郡客館西偏新羅崔致遠為太守時所建故名
觀水樓

在三嘉縣客館南十餘步許樓前有水樓之西偏有淨襟堂

光風樓

在安陰縣客館北樓前有江江外有林藪西偏有霽月堂連構景最清絕

換鵝亭

在山陰縣客館西俯瞰江流連構道士觀縣客山陰故取生右軍事名之

新安樓

在丹城縣東五里東臨大江江之東偏石崖如懸巉巉可觀

右慶尚道五里東湖大丘五之東湖以並吐巖對對下巖
快心亭
在全州府城東南數里許沿流而上山斷水洄築石為基作
亭其上

民樂亭
在右阜郡客館西峯上大野微茫一望無際西有海口潮水
往來

培風軒
在興德縣客館西峯上西臨海口東望大野西勝與民樂亭

相埒

憑虛亭

在羅州東峯上倚郭而構眺望曠遠南望月出東望無等西
有錦城山又大江橫帶於前

右犀亭

在光州城南二里許二川合流盛夏霖雨恒有水患故用李
冰守蜀時故事作石犀以鎮之二水之傍有山稍高如蠶頭
構亭其上以石犀名之亭頗高爽開豁

冬栢亭

在茂長縣北三十里有山陡入海中三面皆水其上冬栢樹
蔥蘢連五六里為湖南勝地

碧波亭

在珍島郡東三十里郡在海島中亭當渡口俯臨大洋

聽潮樓

在康津縣客館南南臨大海潮聲常在樓中故名

廣寒樓

在南原府城南二里許地勢高平敞豁樓前有長川景致清

絕

龍潭臺

在平昌縣南二里許山麓有奇岩高可百尺南望無等下壓

澄潭號曰龍潭臺旁有僧舍

右全羅道

慶迎樓

右忠州客館東樓下有池深廣夏月芙蓉盛開

寒碧樓

在清風郡客館東俯臨大江山水之勝最為清迴東有明月

亭

聚遠樓

在公州客館東樓西有池周五六畝種以芙蓉池心有島島上有茅亭

錦江樓

在州北五里錦江南岸當南北往來渡口景致清爽

宣化樓

在天安郡客館東地勢穹窿眺望曠濶中朝浙東人李明昇有詩

馭風亭

在保寧縣客館北北據高山南控大野登者如馭冷風故名

右忠清道

芙蓉堂

在海州客館西有大池芙蓉盛開堂在池中極有清致

聚遠樓

在延安府客館東據飛鳳山俯卧龍池青草湖金蓮浦在其左右樹林隱映雲烟變態最為勝處

廣遠樓

在黃州客館東 詔使閏有記前後 詔使皆有詩

右黃海道

七寶亭

在咸興府東軒南池中景致蕭洒

浩浩亭

在利城縣客館東東望大海前臨平野

右咸鏡道

乙密臺

在平壤府錦繡山頂平坦敞豁號乙密臺又稱四虛亭

浮碧樓

在乙密臺永明寺東中朝人張浦諸公皆有詩

風月樓

在府城中樓下有池深廣種芙蓉董侍講越有記

望遠樓

在大同江東岸

詠歸樓

在南浦距府城十里挾途左右垂楊拂地

練光亭

在府東城德岩上唐內翰臯有記

快哉亭在州東 在大同館北

百祥樓

在安州北城內

迎薰樓

在定州客館南舊名定遠董侍講越改以迎薰

納清亭

在州東四十里唐內翰臯名之史給事道記之

敵愾亭

在嘉山定大寧江上

觀德亭

在龍川郡東二里

運籌樓

在寧邊府城內

決勝亭

在府夫伊塔津上

偃武亭

在犒項津上

降仙樓

在成川府客館西俯臨沸流江江之西岸有十二奇峯削立如屏人謂之巫山十二峯景致清迥

仁風樓

在江界府城西

右平安道

讓高勾麗琉璃明王書新莽始建國元年扶餘王帶素

我先王與先君東明王相好而誘我臣逃至此欲完聚以成國家夫國有大小人有長幼以小事大者禮也以幼事長者順也今王若能以禮順事我則天必佑之國祚永終不然則欲保其社稷難矣

貽漢將書

後漢光武建武四年

高句麗大武神王

寡人愚昧獲罪於上國致令將軍帥百萬之軍暴露
弊境無以將厚意輒用薄物致供於左右

報書

我皇帝不以臣駕下令出師問大王之罪及境踰旬
未得要領今聞來肯言順且恭敢不藉口以報皇帝

下令

後漢章帝建初七年

新羅婆娑王

今倉廩空匱戎器頑鈍儻有水旱之災邊鄙之警其
何以禦之宜令有司勸農桑練兵革以備不虞

下令後漢章帝

新羅婆娑王

朕以不德有此國家西鄰百濟南接加耶德不能綏
威不足畏宜繕葺城壘以待侵軼

下令後漢章帝

高句麗新大王

寡人生泰王親本非君德向屬友于之政頗乖昭厥
之謨畏害難安離羣遠遯洎聞凶訃但極哀摧豈謂
百姓樂推羣公勸進謬以眇末據于崇高不敢違寧
如涉淵海宜推恩而及遠遂與眾而自新可大赦國
內

下令

後漢獻帝初平二年

近者官以寵授位非德進毒流百姓動我王家此寡人不明所致也令汝四部各舉賢良在下者

遣使朝魏上表

魏孝文延興二年

百濟蓋鹵王

臣立國東極豺狼隔路雖世承靈化莫由奉藩瞻望雲闕馳情固極涼風微應伏惟皇帝陛下協和天休不勝係仰之情謹遣私署冠軍將軍駙馬都尉弗斯侯長史餘禮龍驤將軍帶方太守司馬張茂等投舫波阻搜徑玄津託命自然之運遣進萬一之誠冀神祇垂感皇靈洪覆克達天庭宣暢臣志雖旦聞夕沒永無餘恨臣與高句麗源出扶餘先世之時篤崇舊款其祖釗輕廢鄰好親率士眾凌踐臣境臣祖須整

旅電邁應機馳矢石暫交梟斬劍首自爾已來莫敢
南顧自馮氏數終餘燼奔竄醜類漸盛遂見凌逼構
怨連禍三十餘載財殫力盡轉自孱踈若天慈曲矜
遠及無外速遣一將來救臣國當奉送鄙女執箒後
宮并送子弟收圉外旤尺壤匹夫不敢自有今雖有
罪國自魚肉大臣疆族戮殺無已罪盈惡積民庶崩
離是滅之期假手之秋也且馬族士馬有鳥畜之應
樂浪諸郡懷首丘之心天威一舉有征無戰臣雖不
敏志効畢力當率所統衆風響應且高句麗不義逆

詐非一外慕隗囂藩卑之辭內懷凶禍豕突之行或
南通劉氏或北約蠕蠕共相唇齒謀凌王略昔唐堯
至聖致罰丹水益嘗稱仁不捨塗詈涓流之水宜早
壅塞今若不取將貽後悔去庚辰年後臣西界小石
山北國海中見屍十餘并得衣器鞍勒視之非高句
麗之物後聞乃是王人來降臣國長蛇隔路以沉於
衆雖未委當深懷憤恚昔宋戮申舟楚莊徒跣鷄楮
故鳩信陵不食克敵立名美隆無已夫以區區偏鄙
猶慕萬代之信况陛下合氣天地勢傾山海豈今小

豎跨塞天達今上所得報一以實驗

答詔

得表聞之無恙甚善卿在東隅處五服之外不遠山海歸誠魏闕欣嘉至意用載於懷朕象萬世之業君臨四海統御羣生含宇內清一八表歸義繼負而至者不可稱數風俗之和士馬之盛皆餘禮等親所聞見卿與高句麗不穆屢致凌犯苟能順義守之以仁亦何憂於寇讎也前所遣使浮氣以撫荒外之國後來積年往而不返存亡達否未能審悉卿所送報比

校舊乘非中國之物不可以疑似之事以生必然之過經略權要以具別旨

又詔

知高句麗阻疆侵軼卿上修先君之舊怨棄息民之大德兵交累載難結荒邊使兼申胥之誠國有楚越之急乃應展義扶微乘機電舉但以高句麗稱藩先朝供職日久於彼雖有自昔之釁於國未有犯令之愆卿使命始通便求致伐尋討事會理亦未周故往年遣禮等至平壤欲驗其由狀然高句麗奏請頻煩

辭理俱詣行人不能抑其請司法無以成其責故聽其所啟詔禮等還若今復違旨則過咎益露後雖自陳無所逃罪然後興師討之於義為得九夷之國世居海外道暢則奉藩惠戢則保境故羈縻著於前典楷貢曠於歲時卿備陳疆弱之形具列往代之迹俗殊事異擬况乘衷洪規大略其教猶在今中夏平一宇內無虞每欲陵威東極懸旌域表拯荒黎於偏方舒皇風於遠服良由高句麗即叙未及卜征今若不從詔旨則卿之來謀載協朕意元戎啓行將不云遠

便可豫率同興具以待事時遣報命使速究彼情師舉之日卿為鄉導之首大捷之後又受元功之賞不亦善乎所獻錦布海物雖不悉達明卿至心今賜雜物如別

羣臣上言梁高祖天監二年

新羅智證王時

始祖創業已來國名未定或稱斯羅或稱斯盧或言新羅臣等以為新者德業日新羅者網羅四方之義則其為國號宜矣又觀自古有國家者皆稱帝稱王自我始祖立國至今二十二世但稱方言未正尊號今羣臣一意謹上尊號新羅國王

冊百濟武寧王詔梁高祖普通二年

梁高祖

行都督百濟諸軍事鎮東大將軍百濟王餘隆守藩海外遠修貢職迺誠款到朕有嘉焉宜率舊章授茲榮命可使持節都督百濟諸軍事寧東大將軍



諫獵書

隋文帝新羅
真平王時

金后稷

古之王者必一日萬機深思遠慮左右正士容受直
諫孳孳矻矻不敢逸豫然後德政醇美國家可保今
殿下日興狂夫獵士放鷹犬逐雉兔奔馳山野不能
自止老子曰馳騁田獵令人心狂書曰內作色荒外
作禽荒有一于此未或不亡由是觀之內則蕩心外
則亡國不可不省也殿下其念之

平壤府城



箕田之制詳見圖說茲不具論按朝鮮諸國史略漢建武十九年百濟始種稻則三韓之初井田遺法久已失傳徐兢高麗圖經云國少平地治田於山間高下耕墾如梯磴然其俗不敢有私田略如井田之制隨官吏民共秩序而授之每百五十步為一結只載種植之宜而箕田遺趾獨缺焉朝鮮志井田在府外城內殷人區畫新羅時遺蹟宛然又按鄭麟趾高麗史弓五十八志第十二地理門載有古城基二一箕子時所築城內區畫用井田制其一則高麗成宗時所築府城北兔山上有箕子墓云攷其食貨田

制大抵倣唐制自文武官屬至府兵莫不科授定量田步
之數一結方三十三步二結方四十七步三結方五十七
步三分四結方六十六步五結方七十三步八分六結方
八十步八分七結方八十七步四分八結方九十步七分
九結方九十九步十結方百四步三分此高麗田制之定
矩而與徐兢圖經所載百五十步一結之說又有互異者
盖由生齒日繁田結因時損益而殷人舊制尚存也厥後
量定土田作十八品文班丹衫以上作十品緋衫作八品
綠衫以上作十品雜吏支給不同又有先聖油香田五十

結先聖即箕子亦不忘本之義也索隱箕國子爵司馬彪
注云箕子名胥餘封於朝鮮東表日出之地以有山水故
名此書前後圖說於東國典籍多未及詳載附識於此以
待博雅之採輯云尔

大清嘉慶十有九年歲次甲戌仲冬大興翁樹崑書於石
墨書樓

明王敬字漢英成化辛丑進士歷官太子少保曾偕董內
翰使朝鮮過箕子故宮有感一首柳暗荒城水滿渠幾家
門巷帶却墟井田已廢千年後故壘曾經百戰餘果下更
無尺三馬盤中時有八梢魚遺封舊墓知何在試一停車
問象胥魏時亮字敬吾嘉靖己未進士以兵科左給事使
朝鮮曾經平壤拜箕子墓并訪井田遺跡一道禹範留西
土先生獨向東道無浮海嘆義與採薇同舊井存殷畫舄
冠尚古風荒邱平壤外麥秀想遺宮兩賢皆無詩集賴此
二詩以傳 靜夫大兄過余齋見案頭朝鮮所刻箕田攷

明王敬字漢英成化辛丑進士歷官太子少保曾偕董內
翰使朝鮮過箕子故宮有感一首柳暗荒城水滿渠幾家
門巷帶却墟井田已廢千年後故壘曾經百戰餘果下更
無尺三馬盤中時有八梢魚遺封舊墓知何在試一停車
問象胥魏時亮字敬吾嘉靖己未進士以兵科左給事使
朝鮮曾經平壤拜箕子墓并訪井田遺跡一道禹範留西
土先生獨向東道無浮海嘆義與採薇同舊井存殷畫舄
冠尚古風荒邱平壤外麥秀想遺宮兩賢皆無詩集賴此
二詩以傳 靜夫大兄過余齋見案頭朝鮮所刻箕田攷

借抄裝冊囑余跋識於後因憶十餘年前在紀文達岸舟
書架上見朝鮮柳惠風所著廿一都懷古詩有詠箕子朝
鮮一首麀眠籬斜井字阡一村桑柘望芊芊誰知遼海蒼
茫外耕種殷人七十田注云箕子井田在正陽含樵二門
外區畫宛然見平壤府志附記於此以紀海東墨緣倘得
他日心力稍暇以此攷與廿一都懷古詩重為編輯付素
梨以公同好亦一大快意事也甲戌長至後一日星原又
識

